

*Ipse ruit, dentesque Sabellicus exacuit sus:*

(a) Lib. XI.

Ubi notat Servius: *Sabellicus* : *Sabinus*. Hos populos dixerunt *Sabellos* idem Virgilius Georgicorum libro II. Horatius Satyra II. Lucanus libro II. Ea vero de causa scriptori nostro placuisse *Sabellicum* nomen adoptare, testatur ipsemet epistola (a) quam ad Domitium Palladium Soranum conscripsit, discipulum suum, & poetam latinum non inelegantem. Non *Aristippus* venio, sed homo A SABINIS ORIUNDUS. Quare *Cynthius Cenetensis*, *Petrus Benedictus*, *Venetus*, & *Joannes-Petrus Valerianus*, pro *Sabellico* *Sabellum* eum vocant quibusdam in carminibus, quae in ejus laudem fecerunt, & inter illius opera leguntur. *Sabellum* quoque illum vocat *Nicolaus Canussius* libro de quo infra mentionem facturi sumus. Ipse vero dici noluit *Sabinus*, eo quod nomen illud vulgarius videretur, & ab aliis usurpatum; nec *Sabellus*, veritus *δυναμικῶν*; est enim gentilicium nomen romanae familiae, ejus tempore perinde ac nostro nobilissimae; nec denique *Aequus*, quia videbatur invenustius; quae vitia in *Sabellicum* nomen non caderent.

(b) Venet.  
ap. Ant.  
Moret.  
1529. in 4.

Et quoniam de novorum nominum asciscendorum consuetudine est sermo, non erit ab re monere, tum cum nostra haec loca *Sabellicus* adiit, dedisse operam, ut hic etiam inter literatos, quibus vel discipulis vel amicis usus est, consuetudinem eandem induceret; cujus rei aliquot afferam exempla, sumpta omnia ex locis Veterae Reipublicae subjectis. *Nardinus Maniacensis* nuncupavit se *Nardinum Celinensem*, eo quod *Celina*, cujus *Plinius* meminit, illa in regione sita sit. *Joannes Baptista* & *Bartholomaeus Caeloti*, a *Brugnara*, quod castellum in *Forojulio* est, sub ditione Comitum *Purliliarum*, *Uranios* se, derivato a Graecis nomine, vocarunt; *Uranus* enim graece, fere idem sonat, ac *Caelotus* italice. *Cynthius Cenetensis* dici voluit *Cynthius Acedinus*, quia censebat, *Acedum*, cujus meminit *Ptolemaeus*, esse id oppidum, quod latinis *Ceneta* vel *Cenita* erat, ut ut aliis placeat, *Ptolemaei Acedum* esse id, quod in agro *Tarvisino* vulgo *Asulum* dicunt. *Lodovicus a Ponte*, *Bellunensis*, latere maluit sub nomine *Pontici Virunii*; namque ipse, & *Joannes-Petrus Valerianus*, item *Bellunensis*, falso credidere, antiquorum *Virunum* nihil esse aliud quam *Bellunum*; cum tamen *Virunum* situm esset in *Noricis mediterraneis*, ultra *Carnicas Alpes*, ad fluvium *Dravum*. *Augustus Utinensis* appellavit se *Hunniensem*, quoniam & ipse, & vitae ipsius auctor, quae *Odis* ejus latinis (b) praemissa est, sicuti etiam *Sabellicus* & *Ponticus* antedictus in praefatione ad beati *Odorici* librum, arbitrati sunt, *Utinum* ab *Attila Hunnorum* rege conditum esse, ac propterea *Hunnium* esse dicendum. Quae latinis nominata est *Vicetia*, *Joannes-Stephanus Aemilianus*, cum falso crederet a *Cimbris* conditam, *Cimbriam* illam nominavit, seque non *Vicetinum* sed *Cimbriacum*; rejectoque priori nomine *Joannis-Stephani*, *Quincti* praenomen accepit. *Palladius Niger*, *Patavinus*, audire latine voluit *Palladius Fuscus*. Nec *Venetorum* exempla desunt. Insignis *Nicolaus Thomeus* scribebat se *Leonicum Thomeum*. Quam celebre sit *Baptistae Egnatii* nomen, nemo nescit: at pauci norunt, gentilicium ei nomen fuisse *Joannem-Baptistam a Cipellis*. In *Dominico Mario Nigro*, illustri Geographo, agnoscendus est *Dominicus-Maria Niger*. Erunt & alia plura ejus generis exempla: verum in rem nostram jam dicta suffecerint.

Sed